

Tasiilami erngup nukinganik innaallagissiorfik allilerniarlugu nukissiummik nutaamik innaallagissallu aqputaanik pilersitseqqullugit naalakkersuisut peqquneqarnissaannik inatsisartut aalajangiiffigisassaattut siunnersuut
(Inatsisartuni ilaasortaq, Lars Poulsen, Siumut)

aamma

Tasiilami erngup nukissiorfiup allilernerqarnissaannik Naalakkersuisut peqquneqarnissaannik siunnersuut
(Inatsisartuni ilaasortat Harald Bianco & Knud Mathiassen, Inuit Ataqatigiit)

Akissuteqaat

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

Aappassaaneerpeqarnera

Naalakkersuisut sinnerlugit Sanaartornermut Ataatsimiititaliaq siunnersuutininik suliaqarnerinut isumaliutissiissummillu tunniussineranut qutsavigerusuppara.

Siunnersuutit marluk siullermeerpeqarnerini taperserluarneqarput. Siullermeerinermi Naalakkersuisut allannguutissamik siunnersuuteqarput, Tasiilami erngup nukinganik innaallagissiorfiup allineqarnissaa pillugu suliaq ingerlaqqinnginnerani, avataaneersunik inuiaqatigiit aningaasaqarnerinut kingunerisassaannik misissueqqissartitsisoqassasoq. Naalakkersuisut iluarisimaarlugu paasivaat, suliami inaarutaasumik aalajangiisoqannginnerani sukumiisumik misissuisoqarnissaanut Sanaartornermut Ataatsimiititaliaq isumaqataasoq. Naalakkersuisuniit inuiaqatigiit aningaasaqarnerannut kingunerisassannik misissueqqissaartitsisoqarnissaanut ilassutitut aningaasaliissutinik qinnuteqartoqassaaq.

Ataatsimiititaliap isumaliutissiissuteqarnermini oqaatigaa, taarsigassarsilluni aningaasalersuinissaq aningaasalersuinissamut aqqiissutissat arlaliusut ilagigaat ataasiinnaq. Avataaneersunik inuiaqatigiit aningaasaqarnerannut kingunerisassannik misissueqqissaartitsinerup inerner apeqputaalluni, erngup nukinganik innaallagissiorfiup allineqarnissaa taarsigassarsilluni aningaasalersorneqarsinnaanngitsoq paasinarsinnaavoq. Tamatumunnga atatillugu aningaasaleeriaatsinik allani peqarnerisooq Ataatsimiititaliaq aperivoq. Tassunga tunngatillugu Naalakkersuisuniit ilisimatitsissutigineqassaaq, erngup nukinganik innaallagissiorfiup taarsigassarsilluni aningaasalersorneqarnissaanut taarsiullugu, ukiuni tulliuttuni aningaasanut inatsisissani sanaartornermut aningaasaliissutissannik siunertamut immikkoortitsinissaq periarfissaasoq. Tassalu Naalakkersuisut aamma Sanaartornermut Ataatsimiititaliaq aalajangiinissamut tunngavissamik kissaatigineqartumik saqqummiussippata, apeqput taanna aningaasanut inatsisissat pillugit isumaqatiginninniarnermut tulliuttunut ilaatinneqarsinnaavoq.

Taamatut oqaaseqarlunga ataatsimiititaliap allannguutissatut siunnersuutaata akuerineqarnissaa inassutigaara.